



**CONVENIO DE COLABORACIÓN ENTRE A CONSELLERÍA DE CULTURA,
EDUCACIÓN E ORDENACIÓN UNIVERSITARIA E A UNIVERSIDADE DE
SANTIAGO DE COMPOSTELA PARA A ADECUACIÓN E POSTA EN MARCHA DE
ESTRUTURAS DE INVESTIGACIÓN.**

Santiago de Compostela, 27 de maio de 2016

COMPARECEN

Dunha parte, o Sr. Román Rodríguez González, conselleiro de Cultura, Educación e Ordenación Universitaria (en diante CONSELLERÍA), nomeado mediante o Decreto 15/2015, do 9 de febreiro (DOG núm. 27, do 10 de febreiro), de acordo co disposto no artigo 34 da Lei 1/1983, do 22 de febreiro, de normas reguladoras da Xunta e da súa Presidencia e no acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e de colaboración con particulares, publicado pola Resolución da Consellería de Economía e Facenda do 8 de abril de 1991 (DOG núm. 82, do 30 de abril).

Doutra parte, o Sr. Juan Manuel Viaño Rey, reitor magnífico da Universidade de Santiago de Compostela (en adiante USC), en representación desta, en virtude das facultades que lle confire o artigo 20.1 da Lei orgánica 6/2001, do 21 de decembro, de universidades.

Interveñen en función dos seus respectivos cargos e no exercicio das facultades que teñen conferidas e

EXPOÑEN

PRIMEIRO.- Que a USC é unha institución pública dotada de plena personalidade xurídica e patrimonio propio, que asume e desenvolve as súas funcións como servizo público esencial á comunidade mediante o estudo, a docencia, a investigación e a transferencia do coñecemento, actividades para as que goza de autonomía, de acordo cos seus estatutos (aprobados polo Decreto 14/2014, do 30 de xaneiro, DOG núm.29, do 12 de febreiro) e no marco da lexislación vixente. A USC, constituída polos campus de Santiago e Lugo, estrutúrase basicamente en departamentos, facultades, escolas, institutos universitarios de investigación e escolas de doutoramento.



A investigación de calidade na USC constitúe unha función esencial como instrumento de xeración de novo coñecemento, fundamento da docencia, medio para o progreso da comunidade e soporte da transferencia social do coñecemento. Para tal efecto, a universidade asume o desenvolvemento da investigación científica, técnica, humanística e artística, así como a formación de persoal investigador e a transferencia dos resultados da investigación, atendendo tanto á investigación básica como á aplicada e ao desenvolvemento experimental e tecnolóxico.

Segundo os estatutos da USC, esta poderá promover estruturas propias ou mixtas, en colaboración con outros organismos públicos e privados, para o desenvolvemento de programas e accións de investigación, de canalización das iniciativas investigadoras do persoal docente e investigador, de transferencia dos resultados da investigación e de captación de recursos para o seu desenvolvemento.

SEGUNDO.- Con data do 12 de setembro de 2012 formalizouse un convenio de colaboración entre a CONSELLERÍA e a USC para a construción do Centro de Biomedicina Experimental (CEBEGA).

O CEBEGA como centro de experimentación animal conta cun gran edificio localizado no Campus de Excelencia Internacional Campus Vida que prestará servizo a tódolos axentes do ámbito das Ciencias da Vida (grupos de investigación do SUG, institutos de investigación Sanitaria de Galicia, OPIs, ...) que demandan animais de laboratorio de calidade, definidos ética, legal, sanitaria e xeneticamente. Así mesmo, achegará as infraestruturas singulares para as técnicas máis avanzadas de experimentación biomédica, baseada en modelos animais de experimentación para prover das diferentes especies e cepas de animais de investigación, dotando aos/as investigadores/as das instalacións e laboratorios de apoio axeitados para a realización da súa investigación nun entorno óptimo.

Para a apertura e posta en funcionamento do CEBEGA a USC precisa de financiamento para dotalo de sistemas de control, monitorización de instalacións, seguridade, sinaléptica e comunicacións, de equipamento sanitario, esterilización, desinfección e servizos varios, de equipamento científico auxiliar (cabins de gases, mesas perfusión, conxeladores...) e de mobiliario de apoio e dotación de vestiarios e baños.

Así mesmo, outra actuación necesaria para a apertura do CEBEGA é a urbanización dos 5.443 m² de espazos exteriores ao edificio, mimetizando na medida do posible o centro co seu entorno.

TERCEIRO.- Os laboratorios e espazos da Facultade de Física da USC na súa situación actual (polo traslado de diferentes grupos ao Centro Singular de Investigación en Tecnoloxías da Información -CITIUS-) resultan insuficientes e incluso non axeitados para desenvolver as



actividades de investigación prevista para a posta en marcha e desenvolvemento da Agrupación Estratéxica de Física Fundamental e Aplicacións na Tecnoloxía e a Saúde (AEFIS), á que están adscritos os seguintes grupos de investigación: Física do Estado Sólido, Nanometais, Fotónica e Materia Branda, Coloides e Polímeros, Sistemas Radiantes, Biofísica e Interfase, Materia Branda e Biofísica molecular, Propiedades Termofísicas e Superficiais de líquidos e Detección de Neutrinos.

Así mesmo, os espazos tamén resultan limitados e carecen da adecuación e nivel de excelencia suficiente para os dous proxectos ERC-Starting Grant que se están desenvolvendo na facultade por asociados da AEFIS.

En consecuencia, faise necesario a reubicación da Electrónica e Computación, o acondicionamento de espazos para a AEFIS, a xestión da autorización da instalación radioactiva do Láser PET, ...

CUARTO.- Que a Secretaría Xeral de Universidades, de acordo coas competencias que lle outorgou o Decreto 4/2013, do 10 de xaneiro, de estrutura orgánica da CONSELLERÍA, debe velar pola promoción e xestión eficiente e integrada dos recursos e capacidades de investigación do Sistema universitario de Galicia (SUG) para a súa vertebración e posta en valor no marco do Sistema de innovación. Entre estas competencias está a promoción da coordinación das universidades galegas no establecemento de programas, infraestruturas e actuacións en materia de investigación.

QUINTO.- Que o Plan galego de investigación, innovación e crecemento asume no eixo estratéxico 4 (valorización do coñecemento), na liña de actuación 1.4 (captación de talento investigador de prestixio internacional) que Galicia ten que impoñerse como obxectivo incrementar o seu peso no panorama internacional da ciencia e a tecnoloxía. Para iso débese poñer en valor as capacidades científico - tecnolóxicas actuais e futuras, co obxecto de facelas cada vez máis atractivas ao colectivo científico internacional, afeito á mobilidade en base á calidade dos proxectos científicos ofertados. Neste sentido, con esta actuación tamén se pretende captar investigadores/as internacionais capaces de liderar proxectos de alto impacto nos centros tecnolóxicos e centros de investigación do Sistema galego de innovación.

Polo exposto, as partes abaixo asinantes acordan subscribir o presente convenio, que se rexerá polas seguintes

CLÁUSULAS



PRIMEIRA.- Obxecto do convenio e finalidade

O obxecto deste convenio é establecer as condicións polas que se rexerá a colaboración da CONSELLERÍA coa USC para a apertura e posta en funcionamento do CEBEGA e para o acondicionamento de laboratorios e espazos de investigación na Facultade de Físicas (nomeadamente, o desenvolvemento da AEFIS e dos proxectos dos ERC-Starting Grant asociados a dita agrupación).

O orzamento da actuación ascenderá a 909.649,00 €, cos seguintes conceptos:

CONCEPTO	IMPORTE (sen IVE)
Sistemas de control, monitorización de instalacións, seguridade, sinalética e comunicacións no CEBEGA	175.000,00 €
Equipamento sanitario, esterilización, desinfección e servizos varios no CEBEGA	80.000,00 €
Equipamento científico auxiliar (cabinas de gases, mesas perfusión, conxeladores...) no CEBEGA	85.000,00 €
Mobiliario de apoio e dotación vestiarios e baños no CEBEGA	138.000,00 €
Obra de urbanización do entorno do CEBEGA	240.000,00 €
Acondicionamento de espazos de investigación para actividades científicas da AEFIS e o desenvolvemento de proxectos ERC-Starting Grant	162.649,00 €
Xestión de autorización da instalación radioactiva do Láser PET da AEFIS	29.000,00 €
TOTAL	909.649,00€

SEGUNDA.- Contía da axuda

A dotación da CONSELLERÍA para este convenio é de novecentos nove mil seiscientos corenta e nove euros (909.649,00 €), na anualidade de 2016 e con cargo ao Plan galego de financiamento universitario 2016-2020 (aprobado polo Acordo do Consello da Xunta de Galicia do 29 de outubro de 2015, DOG número 221, do 19 de novembro), aplicación orzamentaria 10.40.561B.744.0 (2016 00129).

Esta cantidade de 909.649,00 € trátase dun importe certo, e queda por conta da USC a diferenza de financiamento necesario para a total execución da actividade subvencionada, debendo ser reintegrado ao financiamento público no caso e polo importe que supere o custo total e real da actividade, segundo o establecido no artigo 21.2 do regulamento da Lei 9/2007, do 13 de xullo, de subvencións de Galicia, aprobado polo Decreto 11/2009, do 8 de xaneiro. A axuda é compatible con outras concedidas para o mesmo fin, pero en ningún caso, o importe da subvención achegada pola CONSELLERÍA poderá ser de tal contía que, illada ou en concorrencia con outras subvencións, supere o custo da actividade subvencionada.

De acordo co disposto na comunicación da comisión sobre o Marco de axudas estatais de investigación e desenvolvemento e innovación (2014/C 198/01), publicado no Diario Oficial da Unión Europea do 27 de xuño de 2014, a subvención prevista neste convenio non constitúe



axuda de Estado nos termos do artigo 107 do Tratado de funcionamento da Unión Europea ao tratarse de financiamento público de actividades non económicas como instrumento axeitado para dar resposta ao obxectivo do interese común. É unha axuda dirixida a adecuación e posta en marcha de estruturas de investigación da USC, organismo de investigación de natureza pública e sen ánimo de lucro.

TERCEIRA.- Obrigas

A CONSELLERÍA comprométese a financiar as actuacións recollidas na cláusula primeira, logo da acreditación do gasto de acordo coa normativa aplicable.

A USC, por ter a consideración de sector público de acordo co artigo 3.1 do texto refundido da Lei de contratos do sector público, aprobado do Real decreto lexislativo 3/2011, do 14 de novembro, está sometida en canto á contratación de obras e subministracións ao establecido na dita lei.

A USC deberá presentar unha declaración responsable, para proceder á sinatura do convenio e despois para o seu pagamento, de estar ao día no cumprimento das obrigas tributarias ou fronte á seguridade social e de non ter pendente de pagamento ningunha outra débeda coa administración pública da comunidade autónoma.

CUARTA.- Fórmula de pagamento

A Consellería de Cultura, Educación e Ordenación Universitaria efectuará o libramento dos fondos contra a presentación pola USC dunha memoria na que se dea conta do destino da achega e dunha certificación expedida polo órgano de control correspondente na que se da toma de razón en contabilidade da achega. Especificarase o cumprimento da finalidade do presente convenio e que os fondos foron destinados a este fin, así como o detalle da realización dos pagamentos achegando a seguinte documentación:

- Facturas expedidas polas empresas adxudicatarias dos traballos relacionados co obxecto deste convenio. Achegarase xunto coas devanditas facturas o comprobante do pagamento efectuado e as certificacións de obra ou calquera outro documento con validez xurídica que permita a acreditación do cumprimento da finalidade da subvención.
- A documentación correspondente aos procesos de adxudicación, segundo o establecido no Real decreto lexislativo 3/2011, do 14 de novembro, polo que se aproba o texto refundido da Lei de contratos do sector público. Así mesmo, débese ter en conta o establecido no artigo 29.3 da Lei de subvencións de Galicia e no caso de ter que solicitar as tres ofertas tamén as deberán achegar xunto coa xustificación.



A data límite de presentación da referida documentación de xustificación do gasto establécese no día 20 de decembro de 2016.

Deberá presentarse unha declaración complementaria do conxunto das axudas solicitadas, tanto as aprobadas ou concedidas como as pendentes de resolución, para o mesmo fin, das distintas administracións públicas.

Así mesmo, deberase presentar unha declaración responsable de estar ao día no cumprimento das obrigas tributarias ou fronte á seguridade social e de non ter pendente de pagamento ningunha outra débeda coa Administración.

QUINTA.- Vixencia do convenio

O presente convenio entrará en vigor na data da súa sinatura, sen prexuízo de que poidan atender accións realizadas desde o 1 de xaneiro de 2016 e terá vixencia ata o 31 de decembro de 2016.

Non obstante ao establecido no apartado anterior, este convenio poderá extinguirse por acordo mutuo e voluntario das partes, por desistencia dalgunha ou por denuncia deste por incumprimento dalgunha delas, o que se comunicará fidedignamente, logo de audiencia desta e con, polo menos, un mes de antelación. En calquera destes casos procederase á revogación da axuda, así coma ao reintegro total ou parcial das cantidades percibidas e a esixencia de xuros de mora nos casos previstos no artigo 33 da Lei 9/2007, do 13 de xuño, de subvencións de Galicia.

SEXTA.- Responsabilidade

A subscrición do presente convenio non supón relación laboral contractual ou de calquera outro tipo entre os/as profesionais que vaian desenvolver as actividades e a CONSELLERÍA, de tal xeito que non se lle pode esixir responsabilidade ningunha, indirecta nin subsidiaria, polos actos ou feitos acontecidos no seu desenvolvemento.

A subvención estará sometida á función interventora e de control financeiro exercida pola Intervención Xeral da Comunidade Autónoma, nos termos que establece a Lei 9/2007, do 13 de xuño, de subvencións de Galicia. Así mesmo, estarán sometidas ás actuacións de comprobación e previstas na lexislación do Tribunal de Contas e do Consello de Contas no exercicio das súas funcións de fiscalización e control do destino das subvencións.

SÉTIMA.- Comisión de seguimento

Para o seguimento do convenio ou coñecemento de calquera cuestión sobre a súa interpretación, modificación, resolución ou efectos deste que poidan xurdir, créase unha comisión mixta constituída do seguinte modo:



- Tres membros da Secretaría Xeral de Universidades, dos que un/unha actuará como presidente/a.
- Tres membros da USC.

A dita comisión actuará como órgano de vixilancia, seguimento e control do establecido neste convenio, promovendo, se o considera conveniente, outras actuacións que poidan enriquecer o seu desenvolvemento.

Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á subvención concedida serán resoltas pola CONSELLERÍA.

OITAVA.- Publicidade e transparencia

Segundo a disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, a USC consente expresamente para que a Administración autonómica inclúa e faga públicos, nos rexistros regulados neste decreto, os datos relevantes referidos ás axudas e subvencións recibidas, así como ás sancións impostas.

A reserva que puidera facer a USC no sentido de non autorizar a obtención dos datos ou a publicidade destes nos rexistros, que en todo caso terá que expresarse, poderá dar lugar á exclusión do proceso de participación para obter a axuda ou á revogación do acto de outorgamento.

En aplicación dos principios recollidos na Lei 19/2013, do 9 de decembro, de transparencia, acceso á información pública e bo goberno e de acordo co indicado na actual redacción do artigo 20 da Lei 38/2003, do 17 de novembro, xeral de subvencións, a información correspondente ao presente convenio publicarase na Base de Datos Nacional de Subvencións. Ademais, o convenio incluírase nun rexistro de convenios público e accesible e referenciarase no Diario Oficial de Galicia, todo iso de conformidade co establecido no artigo 15 da Lei 1/2016, do 18 de xaneiro, de transparencia e bo goberno.

As partes asinantes do presente convenio manifestan o seu consentimento ou autorizan para que os seus datos persoais que constan no convenio, e mailo resto das especificacións contidas no mesmo, podan ser publicados no Portal da Transparencia e Goberno Aberto.

NOVENA.- Natureza do convenio

De acordo co establecido no artigo 36 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, este convenio ten un



interese público, xa que de conformidade co previsto nos artigos 53 e 54 da Lei 6/2013, do 13 de xuño, do Sistema universitario de Galicia (DOG núm. 125, do 3 de xullo) corresponde á Xunta de Galicia, a través da Consellería de Cultura, Educación e Ordenación Universitaria, coordinar as universidades do SUG para acadar a mellora da docencia, a investigación, a extensión universitaria, a promoción, a adaptación ás demandas e necesidades da sociedade e a realización de estudos no ámbito da docencia, investigación, innovación, xestión, ...

No artigo 7 da dita Lei 6/2013, do 13 de xuño, indicase que as universidades públicas do SUG estrutúranse en campus universitarios concibidos como complexos organizativos territoriais e espazos de integración e convivencia. Por ese motivo cando a Xunta de Galicia fomenta o avance das universidades públicas cara a organización territorial, tendente a unha maior especialización, compatibilidade e calidade docente e investigadora no Campus Vida, non é necesario promover a concorrência competitiva xa que o referido campus está integrado na USC (segundo o establecido na disposición adicional primeira da referida Lei do sistema universitario de Galicia). Esta circunstancia xustifica a imposibilidade de conveniar con outras universidades para esta finalidade.

O presente convenio de colaboración ten a natureza dos previstos no artigo 4.1c) do texto refundido da Lei de contratos do sector público, rexéndose para os seus efectos pola normativa xeral en materia de contratos das administracións públicas e polo establecido na Lei 9/2007, do 13 de xuño, de subvencións de Galicia e o seu regulamento, aprobado por Decreto 11/2009, do 8 de xaneiro.

DÉCIMA.- Resolución de controversias

O presente convenio réxese en canto a súa interpretación e desenvolvemento polo ordenamento xurídico administrativo, con expresa submisión das partes á xurisdición contencioso-administrativa, nos termos que se establecen no artigo 8.3 da Lei 30/1992, do 26 de novembro, de réxime xurídico das administracións públicas e do procedemento administrativo común.

Lido por todas as partes, por si mesmas, e como proba de conformidade co expresado no presente convenio, asínano e rubrícano por triplicado, no mesmo lugar e data que se indica ao comezo.

Pola Consellería de Cultura, Educación
e Ordenación Universitaria,

O reitor da Universidade de Santiago de
Compostela,

Román Rodríguez González.

Juan Manuel Viaño Rey